



# UTebello Nyokong, uSosayensi olwisana nekankere

Nomsa Angelina De Wee  
Simon Mokoena



---

UTebello Nyokong unguSosayensi  
oqakathekileko eSewula Afrika.

Ilwazi lakhe lisiza ukuphatha nokusindisa  
abantu abanamalwele anamandla.



Njengomntwana, uTebello wabe ahlala nogogo banobamkhulu wakhe eLesotho. Bamkhulisa kuhle.

Kwelinye ilanga uzakuqala izimvu bese ngelanga elilandelako uzakuya esikolweni. Lokhu kwaba kuthoma kwefundo yakhe.



Lokha uTebello nakagada izimvu, wabona nezinye iinlwana kanye neentjalo.

UTebello wabe anakareko ephasini mazombe. Wabe amntwana onetjisakalo yokufuna ukwazi.

Ufunda okunengi ngemvelo ebuya eentjalweni neenlwaneni eplasini.






UTebello wabe afuna ukufunda iSayensi esikolweni.

Bamtjela bona angalingi. Bamtjela bona kubudisi khulu ukufunda.

Bathi iSayensi ingeyabesana ingasi abantazana.

Ekuthomeni wathoma wabalalela. Abangani bakhe esikolweni bebenza ezinye iimfundo.



Kodwana uTebello bekazimisele ukufunda ngeSayensi.  
Bekazi bona angakwenza lokhu.

Ekugcineni, bamvumela ukobana afunde isifundo lesi.  
Wabe athabe khulu begodu wabe asebenza kühle kiso.

Wathoma ukufunda iSayensi iminyaka emibili  
ngaphambi kokuqeda ukufunda esikolweni  
esiphakemeko.



UTebello usebenza ngamandla ukobana abambe abanye abantwana ekukade basetlasini yeSayensi.

Bekahlakaniphile, azimisele begodu athanda nokufunda.

Wafunda iSayensi yakhe esikolweni esiphezulu iminyaka emibili begodu waphumelela ikhoso!





Ikhemistri imhlobo wePhysical Science. Inganye indawo elwazini leSayensi. Le bekuyindawo yeSayensi uTebello abe ayithanda khulu.

Iintjengisombono zeKhemistri zenziwa eLabhorethri yeSayensi.

UTebello bekazi bona ufuna ukuya eyunivesithi, ukobana ayokufunda iKhemistri!






UTebello wazitlolisela ukwenza iziqu zeSayensi eYunivesithi yeLesotho.

Wabe amfundi ohlakaniphileko begodu asebenza ngamandla. Wabe athatha isikhathi esinengi ahlezi ngeLabhorethri asenza iintjengisombono.

Wazusa imiphumela emihle, wathumba nomfundalize wokuyokufunda eCanada.



UTebello wabe athanda ukufunda iSayensi, kodwana watluwa nakufanele atjhiye umndeni wakhe nabangani bakhe e-Afrika.

Wakhamba waya eCanada ngombana wabe afuna ukufunda ngerhubhululo leSayensi lapho.

Wabe afuna ukuba ngusolwazi emkhakheni weSayensi.



UTebello wathola abangani abatjha eCanada.

Bebakhuluma amalimi ahlukeneko, kodwana i-English yabasiza ukobana bakghone ukuzwana kuhle nabakhulumako.

ECanada, bekunerhwaba elikhithika emadorobheni njengeentabeni zeLesotho.

Akhange kube sikhathi eside, uTebello wathumba godu omunye umfundalize ukobana aragele phambili nokufunda.





Okulandelako, wakhamba watjunga eyunivesithi ye-Amerika. Wanqophela erhubhululweni lesayensi ukulwisana namalwele anamandla.

Ngemuva kweminyaka eminengi afunda, uTebello wabuyela ekhaya. Wabe afuna ukusebenzisa ilwazi lakhe ukobana asize abantu eSewula Afrika.

UTebello wabe akholelwa kuye.



Namhlanjesi, uTebello unguPhrofesa weSayensi. UneLabhorethri yeSayensi engeyakhe begodu ufundisa abafundi emayunivesithi.

Urhubhulula ngeendlela ezitja zokusiza abantu abanamalwele anamandla.

Umsebenzi kaProfesa Nyokong ungezelela ilwazi mayelana nokwelapha nokusindisa abantu abaphethwe yikankere.



Umsebenzi wakhe ungezelela elwazini leSayensi elisiza ukulwisana namalwele.

Ipilo yakhe itjengisa ukuqakatheka kokukholelwa kuwe begodu ungapheli amandla begodu ungalilahli ithemba.

Sisafuna godu abanye aboSosayensi abafana noPhrofesa uTebello Nyokong!



## —Imibuzo

1. Itjho iinarha ezintathu lapha uTebello afunda khona. Zithole emebheni.
2. Njengomntwana ingabe uTebello watjheja iphasi elimzombileko? Wazi njani?
3. Kubayini babetjela uTebello bona angafundi iSayensi? Ingabe uyavumelana nabo?

## —Iincwadi eziselungelungeni leli

- U-Andile Mji
- U-Asnath Mahapa
- UBongani Mayosi
- UCharlotte Maxeke
- UMmantsane Moche Diale
- UMulalo Doyoyo
- UTebello Nyokong
- UTshilidzi Marwala

---

Indatjana le yatlhanywa begodu yatlolwa  
ngelimi leSesotho, njengengcenyane yeprojekthi  
yeZenex Ulwazi Lwethu ye-2020 yeencwadi  
ezingafundwa.





Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).



NELSON MANDELA  
INSTITUTE FOR  
EDUCATION AND  
RURAL DEVELOPMENT



Room to Read®  
World Change Starts with Educated Children®

Your attribution should include the following:

Title: UTe bello Nyokong, uSosayensi olwisana nekankere

Author/s: Nomsa Angelina De Wee

Translator/s: Sponono Mahlangu


Illustrator/s: Simon Mokoena

Assurer/s: William Jiyana

Language: isiNdebele

© Zenex Foundation - Saide 2023

CC BY includes the following elements:

BY  - Credit must be given to the creator

